

En pia regurdientscha da

Tumaisch Soliva-Lackner, Sedrun

Ils 23 da settember annunzia il zenn da sogn Vigeli a Sedrun la mort da Tumaisch Soliva-Lackner. El ha rendiu baul quei di el spital a Glion si'olma – suenter esser bein preparaus – al Scaffider. Leu veva el stuiu serender zacons dis avon e sesutametter ad ina operazion. Il sestentar da miedis e soras ei staus vans. Il Segner veva destinau auter. Il Tumaisch ha astgau mirar senza tema en fatscha alla mort, schend: «Miu Diu, buca mia veglia davanti, mobein la Tia».

Tumaisch Soliva ei naschius ils 20 da december 1907 a Sedrun sco secund giuven da tschun fargliuns dils geniturs Gion Battesta e Cresenzia Soliva, naschida Beer. En quei ambient eis el carschius si en spért da religiusedad e tema da Diu. Quei ha accompignau el tras sia veta entira. Havend frequentau la scola primara e secundara ha Tumaisch stuiu far il fagot ed ir egl jester. Ins sa s'imaginar tgei patratgs ch'han accompignau el a sias uras, bandunond casa e geniturs. El serenda a Basilea en in hotel. Leu entscheiva el giu bass. Cul temps s'avanza el ad in capavel e honzeli portier, da fina demanonza, quei a Sogn Murezi, Tavau e Flem en hotels d'emprema classa. Ins saveva appreziar quei survient. El fuva beinvesius da patrunz e hospz.

A Basilea ha el empriu d'enconuscher sia futura consorta: Matilda Lackner, oriunda da Vienna, medemamein occupada ella branscha d'hôtels. 1934, ils 25 da settember, han els giu nozzas. Sil di 45 onns suenter eis el vegnius surdaus alla fossa. Quella lètg ei stada benedida da tschun affons: dus buobs e treis buobas. Igl onn 1936, schegie ch'ei fuva in temps magher, ha el baghegiau – enslemen cun siu quinau Nicolaus Albin – ina



casa nova a Sedrun. Quei ha segir caschunau quitaus e dumandau per severonza da vegnir quels onns schliats cun pauc u negina fadigia ad in agen tetg.

Cun 1939 – cu la secunda uiara ei rutta ora – ei vegniu tratg in streh atras bia quens da Tumaisch e dad auters. El ha stuiu returnar a casa e serender en survetsch militar. 1943 vegn el elegius sco administratur dil consum (Coop). A quei post eis el sededicaus cun tgierp ed olma varga 30 onns. Alla vischnaunca sco era alla cassa da malsausa dalla Cadi ha el surviui duront onns ed onns sco capavel e consciencius revisur da quen. Il plascher grond dil defunct fuva sia cara famiglia. Bugen deva el era in scart troccas, siu hobi per propri. Il Tumaisch ei staus in um da pintga canera, denton adina promts per render in survetsch al proxim e da gronda religiusedad e tema da Diu. Preziau e stimau Tumaisch! Ti has ussa finiu il cuors dalla veta. Ruaussa enten il Segner e la glisch perpetna sclareschi a Ti ed a tutz nos cars defuncts. Als ses, restai anavos, nossa condolentscha la pli sincera. G.F.